

Мускоын пумиськон

Кузебай Гердэз, куке со вал на Кузьма Чайников но ужа на вал Малмыжын, 1918-тй арын нбыль толэзылы – толсурисен оштолэзёзь – ыстйзы Муское курсёсы. Келякузы эшъёсыз сое одно ик Максим Прокопьев доры пыраны косйзы.

Кöня ке нунал ортчыса, Кузьма, букинистьёс дорысь али гинэ басьтэм «Калевала» эпосэн книгазэ съöраз кутыса, Прокопьев доры Трубниковской шуон ульчае пуксем баджым юртэ мынйз. Кык удмурт пиос, ог-огзылы шумпотыса, юн жыгыртйськызы. Кузьмалэн соку ик ушъяськемез потйз: учкы, пе, кыче тунсыко литература кылдытйллям финньёс, асьмелы но отчыозь вуоно вылэм, мон но гожто удмурт батырьёс сярысь поэма. Прокопьев, куноезлэсь сыче жутскем мылкыдын верамзэ кылзыса, егит эшсэ басылмытйз. «Сыл ай, Кузьма, – вазиськыз со, – нырысь асьмелы Колчакен ожмаськись удмурт батырьёс сярысь гожъяно. Нош та ож быриз ке, асьмеос асьмелы государство кылдытом. Тани мон лэсьтй ни конституция но, карта но, ваньзэ сое йылаз-пумаз вуттоно на».

Прокопьев жöген Колчаклы пумит ожмаськыны кошкыз. Нош Кузьма, тифен висеменыз, Мускоысь инвожое гинэ бертйз но жöген тодйз, Прокопьев Пермь палась Кунгур дорын бырыны шедем шуыса. «Гудыри» газет кызы куатетй гудырикошконэ потэм номераз Кузьмалэсь Прокопьев сярысь «Удмурт батыр» гожтэмзэ печатлаз.

Граждан ож йылпумъяськыз но, удмуртьёслы асьсэлы кун кылдытон ужпум меёак жутскиз. Кузьма, удмуртьёс бабеме медаз кыле вал шуыса, аслыз ачиз кыл сётйз удмуртьёсыз одйг уже, одйг гердэ герзаны но огъя уже кыскыны. Аслаз кылбуръёсыз улэ со Герд нимын гожтйськыны кутскиз. Ыбем куара кадъ вакчи но гудырес кыл борды кузь кыл кулэ шуыса, нимзэ кариз Кузебай.